

摘藻堂四庫全書薈要

集部

欽定四庫全書薈要

集部

御選宋詩卷

五十九
六十

詳校官原任主事

臣 李斯咏



欽定四庫全書薈要卷一萬八千三百六十六

集部

御選宋詩卷五十九

五言長律三

朱長文

仲春上丁知府金部躬率僚寀釋奠於先聖既而升公堂命學官講書竊惟中庸之篇自安定先生嘗以是誨人閱歲既久嗣音者稀某孤陋無似竊慕前哲其啟講也今龍閣黃公嘗臨之



其終講也金部使君又臨之郡儒在列咸與榮
觀輒成五言律詩二十韻敘謝

天意紹斯文成書在聖孫一篇窮妙理萬古誦微言美
行敷華葉精誠固本根並明參日月幽贊極乾坤奧義
誰鑽仰真儒善討論

謂安定先生也

披雲觀泰華行水自崑崙

庠序非才處詩書素志敦崇朝羞倚席暇日廢窺園辨
惑開羣聽潛心到大原意將追往哲學豈為專門盛府
連稱治耆英繼典藩始終臨講席前後枉高軒全帳羅

金鼎盈庭倒玉樽旌旗來有慶衿佩寂無喧士識師資
貴民知道義尊僖公史館頌鄭校相君存芹藻歡欣意
陵阿長育恩中材多杞梓寶器列瑤琨五紀登朝盛羣
英著籍繁美哉文正學遺澤洽元元

劉弇

題仰山二十韻

維南斗牛下萬仞聳崔嵬日上光先占江盤勢却迴一
方蒙雨露幾處對樓臺不逐秦鞭去曾經禹載來雲生

峰慘澹冰泮谷喧飀險外煙嵐變深中洞府開巖花春

灼爍溪鳥暖毳毼飛瀑含清籟乖龍走疾雷平川蕭廟

閔半腹鄧壇摧

蕭公兄弟廟在山下鄧表昔於此上升有壇存

精蘊瓊瑰寶奇

鍾杞梓材僧軒宜辟荔樵徑怯莓苔旁晚龍洲橘前瞻

庾嶺梅仙經饒地脉賦筆讓天台神物多靈貺農田少

旱灾隱居須獨行吟詠亦難才何客能依止伊余敢語

哉一麾誠繫滯四友阻追陪

謝靈運與族弟惠連何長瑜荀雍羊璿之共為山澤

之游時人謂之四友

未脫紅塵累徒嗟白髮催夢頻生枕席賞每

倒樽疊預恐瓜期待圖歸作醉媒

鄒浩

次韻慎微雪

萬物歸根後端來兆物華
仙姿擬鶴氅雲路擁羊車
但喜天時正寧知帝力加
有田皆玉粒無樹不瓊花
浪說朱蹄馬空餘白首鴉
酒邊深薦爽穽處巧藏窠
徑斷回樵斧波橫倚釣槎
高門委金帛陰壑脫龍蛇
功茂豐年穀名喧好事茶
叢輕頽瓦竹搖迴動籤牙
蝶冷殘初夢

蜂寒悶兩衙殷勤非俗韻
瀟灑是生涯火變人窺異軍
潛夜肅譁暗香迷綻蕊
新築露平沙寸食方從寄扁舟
未可拏只應清興在猶似子猷家

唐庚

峽路

上馬復下馬羸軀不暫停
鈴聲今古道柳色短長亭
亂石波翻雪洪崖岫破青
羊歸泂絕壁鹿飲入寒汀
兩岸橫遮月中天畧見星
雲來通玉壘江去背滄溟
春少花

難折霜多葉易零
愛山猶著物畏棧未忘形
事業知安在艱危已備經
宦游方此始何日遂鴻冥

游仙雲宮

出郭三竿日橫江
一葦杭雀飛田有麥蠶罷野無桑
下馬危梯滑開門古殿香
雨餘丹井溢苔入醮壇荒
畫老星辰動碑殘歲月亡
鐘聲落城市符祝走村鄉
野鳥啼巴蜀山崖刻漢唐
臨歸更回首惜此一襟涼

傅察

清微亭分韻得空字

縹緲千層外，紫紆一徑通。
飛甍明落日，巨棟挂斜虹。
賞眺資公退，招邀得調同。
九天開浩蕩，萬象入牢籠。
水色連晴碧，雲容借晚空。
清來庾公興，快挹楚王風。
座側金罍倒，樓昏畫角終。
明朝車馬客，陡覺厭塵紅。

李綱

自梅趣汀行小路，堽堦危甚。
六月十一日宿金沙寺。

觸熱過梅川境
嵒鳥道邊林深
晴有霧土曠晝
稀煙略
約橫溪小籃輿
礙石偏亂蟬鳴
翳蒼疊澗瀉潺
湲閩嶺
雖近止江鄉猶
渺然何曾愁瘴
癘祇是怯危顛
借問勞
形役何如穩晏
眠遭時正艱棘
賦分自迴遘已
辛生還
里寧辭險著鞭
夜涼棲野寺相
對月嬋娟

自劔浦乘舟至水口溪流方漲備見湍激奔猛
之狀賦詩以紀其事

避地適南土捨車登葉舟春溪渾帶雨霽石出如牛詰

曲知操妙飄騰覺去適煙籠嵐翠滴灘激浪花浮廉利
森排戟盤迴巧轉輶輕生真可戒快意且銷憂灩澦過
三峽蓬壺訪十洲平生志江海暮景侶巢由易象觀嘉
遜騷經賦遠游扁舟吾入手此外更何求

留題天寧明極堂

久客若飛蓬年年氣味同猶欣容榻地更得化人宮鬱
勃炎蒸極巍峩棟宇雄疎林碎搖月虛館迴含風萬戶
軒楹外三山指顧中靈潮自朝夕大舶各西東悵望關

河遠蒼茫雲海空
餘生寄閒曠
任運學龐翁

檳榔

疎林滄海上結實已纍纍
煙濕潁虬卵風搖翠羽旗
飛翔金鷺鷥掩映籜龍兒
濩落啗椰子勻圓訝荔枝
當茶銷瘴速如酒醉人遲
萋葉偏相稱羸灰亦漫為
乍餐顏媿渥頻嚼齒愁疲
飲啄隨風土端憂化島夷

汪藻

龜山上方

度險逢幽處憑誰寫壯懷連甍棲絕壁孤塔表長淮地
本吳風接山今禹績皆潮聲從殷寺竹影自翻階木杪
朱闌出城堦雪浪埋乾坤迷枉渚霧雨泄陰崖丹葉經
寒在蒼洲向晚佳魚龍宵聽唳猿鳥晝窺齋月滿蟪蛄
實霜清磬石詣僧盂收柏子樵徑埽松釵左宦書無雁
南烹菜有鮭風煙欺短髮雲水信殘骸竟作何鄉老虛
慚素尚乖江湖今在眼歸合辦青鞋

廖剛

題南墩鋪

雨中聞猿聲素所未識復度二峻嶺蓋亦初見因紀行役之勞云

見說龍巖路猿啼今始聞
深林埋宿霧高嶺出層雲
天去頭三尺崖垂足二分
只愁雙目眩敢恃一杯醺
捫歷泥增滑瘡痛日向曛
長安九軌道誰識此艱勤

和周材雪詩

蜡雪緣何喜春工屬此興
宿苗沾潤足盤氣滌除仍亂
舞隨空遠輕黏徹體凝漫
天飛糝玉極目皎鋪繒帶
雨聲初急搏風勢轉增危
簷飄邃幕疎屋灑寒燈瑟
縮鴉

棲怯跳梁犬力勝須臾平坎窞頃刻沒畦塍梅李看山
木瓊瑤數塔層寢眠寧有道賦詠愧非能郭履愁離席
孫窗但枕肱凍從金井水清挹玉壺冰銀闕何勞問雲
臺取次登漁蓑真好畫柳絮足多稱栗冽驚殘歲淒涼
憶舊朋戴君聊欲訪郢調忽難應綺席交銀燭清河映
玉繩詩成凌鮑謝酒渴飲淄渰天朗醒孤鶴風高激怒
鵬齊宮初入夢曉鼓數聲鑿

孫覲

洞庭善慶堂置酒小詩記之

幽曲小蓬壺參差見畫圖
亂青山四出一碧水平鋪
洲蕊紅相照沙草細欲無
蓮房駢百子橘圃聚千奴
布穀休催種提壺且勸酤
楚腰飛燕燕秦缶和鳴鳴
便捷驚回雪連娟引貫珠
西風催畫鷁落日詠驪駒
浩蕩川原隔驚呼歲月徂
寥寥清夜夢直擬控搏扶

妙覺寺適軒

古寺秋崖上清風掩半闌
晚花明豔豔曉溜落潺潺
松

筍穿堦瘦苔窠蔽石斑翹沙憐鷺靜抱葉看蜂還心以
空無累身從病得閒儀曹獨何事終日賦囚山

老厭風沙惡安閒且當禪開簾延白月倚杖立蒼煙烏
散人聲裏鐘殘客思邊小蒲風葉偃薄槿露華鮮句好
吟鬚斷歡餘醉夢偏人生但如此何處不翛然

礬巖

日上千峰亂風涵萬壑秋兩崖坼天罅一水漲巖幽絕
岸飛橋過尋源秉炬遊倚空翹翠葆漱石走蒼虬老樹

攬天立奔雲接地流壯懷開浩蕩病骨聳颼颼皓首殊
方去清樽盡日留無人與說似勝事滿南州

周紫芝

次韻道卿詠雪約遵歐陽文忠公令不得用鶴
玉潔白等字

魯史書平尺王春喜可占弄寒初照砌逐吹旋縈簾水
遠還迷望山高遂失尖欺梅時滿樹妬舞或凌檐鵲凍
癡如夢兒嬌喜欲拈人應橫短櫂誰且卧窮閭壯士知

何畏衰翁亦懶覘打窗時簌簌拂帽更纖纖獸炭寒仍
在駝裘晚自添鷓鴣茶碗醺鸚鵡酒杯甜歲事新愁破
詩章舊令嚴遙思庾樓夜萬里一寒蟾

染衣亭

聞說郊居勝新穿五畝池暗通山窈窕深住碧連漪驚
起紅鸕鷀吹翻綠荔枝雨添衣色秀波渡襪塵遲照眼
誰當唾臨流自可詩水清魚莫種秋近荻須移剩欲添
風月何當更渺瀰却憐韓吏部埋甕作癡兒

玉井橋

水滿雙鴛沼花開玉井蓮
亭浮幽渚外人渡小橋邊
白羽參差在跳珠次第圓
風高與芬馥露重借嬌妍
青坂釣魚老朱闌聽雨眠
時從客容與寧借鷺聯拳
何日回征棹歸來賦短篇
共邀池上月同看水中天

呂本中

與吳迪吉諸人赴晁季一陳塘范園之游因成
十韻

春風未寂寞頻枉故人車客舍輕寒下邳煙宿雨餘曉
紅留隱映新綠上扶疎妙墨懸高榜殘章得舊書蛟龍
忽舒卷草木自清虛渺渺登臨地悠悠水竹居只今那
復有本自不關渠塘水空遺廟鼉淙亦故墟同行喜佳
士所到即吾廬政恐習池飲風流却未如

曹南過五丈河隄入城訪顏岐夷仲清談久之
乃歸

春色不自惜落花如許愁晴天一望遠漕水十分流每

繞長堤去頻因好句留相隨覓季主不必貸河侯論極
文章秘居兼竹石幽和風落香燼晚日汎茶甌壯節知
無用諸儒誤見收江山亦在眼歲月忽忘憂南郭今喪
我長卿仍倦遊漫成長韻律勝與小蠻謳簿領憎頻過
塵埃懶再謀何須五湖口風雨轉船頭

嚴州九日坐上呈胡明仲常子正

今年得交舊九日會嚴州城角風雲暮天涯景色秋功
名有長鉞行李付扁舟苦恨三年別聊因一笑留病添

文字懶老恥稻粱謀活國須公等吾生便可休

陳與義

道中書事

臨老傷行役
籃輿歲月奔
客愁無處避
世事不堪論
白道含秋色
青山帶雨痕
壞梁斜闕水
喬木密藏村
易破還家夢
難招去國魂
一身從白首
隨意答乾坤

晚晴野望

洞庭微雨後
涼氣入綸巾
水底歸雲亂
蘆叢返照新
遙

汀橫薄暮獨鳥渡長津兵甲無歸日江湖送老身悠悠
兼倚杖悄悄自傷神天意蒼茫裏村醪亦醉人

曾幾

雪中登王正中書閣

對雪誰同語登樓似欲仙人家修月戶丈雪散花天山
擁鈎簾外江橫隱几前寒深落雁渚清集釣魚船扶病
從摩詰消愁得仲宣度書明細字烹茗濕疎煙月好還
同夢詩成已下絃明年倘相憶為一到關邊

沈與求

曾宏父作詩別行簡索僕同賦

俗間忘勝踐客裏度春愁
拄頰真狂計焦頭之遠謀剛
疎徒自許德怨浪相求
奏乏三千牘詩慚一百籌
豈能資宦達端合辦歸休
遣興鷺兒酒銷魂燕子樓
枯筇青草渡老屋白蘋洲
此意無窮樂今懷未滿憂
轉喉寧問諱繞指叵思柔
二妙看騰躍頻年歎滯留
花時閉深院雲際渺輕舟
應念騎曹掾平生信謬悠

曹勛

和賀子忱喜雪

蘊玉梅初豔埋青麥自豐漸水留水硯時喜拂窗風能
賦懷王粲開樽憶孔融警寒方認鶴埽徑屢嗔童色動
書帷白寒侵蠟炬紅剡溪方逸想秀句墮春工豈意疎
慵外猶存引領中君須乘暖景一笑得相同

用李參政游延福寺韻上之

落日泉南郡秋風嶺北城台符均庶等杖屨喜幽行與

客情文重持懷事物輕致君皆典禮躋俗向不平相業
甌名在詞華鉢韻成豈惟才廣大且復性澄泓賤子欣
承庇微官得代耕孤單常自畏比數欲誰名索有書千
卷家無屋一楹朝廷今再造心跡漸雙清山轉客容薄
天迷海色橫心期奉圯履鎔冶在高情

朱棹

九日與數客登善福院之絕頂晚飲茗飲閣予
以病先歸賦十二韻

風日追佳節一川秋意昏臨高分石磴却立數煙村楚
製隨雲物蠻花照酒痕龍山嗟未久藍水想空存鴻雁
頻收唳茱萸幾斷魂拍肩尋熟路登閣換餘樽鐘梵規
繩闊親朋笑語溫如籩攜海嶠聞笛憶鄉園夢記南柯
守兵看左角奔詩凡羞晉宋髮短任乾坤汝輩禪心起
今生道眼渾不知東嶂外濫濫湧金盆

姚大本以李義山詩韻作詩題息軒繼作

隱几心疑水攜盆影照山六窗開畔岸一榻埽中間柏

子方饒舌花枝忽解顏定餘牛自牧夢起蝶相關問闔
初無路蓬萊別有班藏舟知夜失面壁竟西還老矣從
他笑公乎伴我閒乾坤詩更好分寸許躋攀

鄭剛中

和方景南乍晴

闌暑如秋近淮濱氣已清風雷驚夜雨鐘鼓報新晴霧
散槐庭曉雲開魏闕明馬行朝露穩人喜積陰傾初鳥
方爭出殘蟬莫亂鳴小窗偏得睡更待晚涼生

擬送楊帥

久戍思賢日中興入覲時
旌旗生喜氣梅柳動寒枝
報國心偏苦安邊計自奇
一軍常北出萬騎絕南窺
結軌聞修好橐弓謹退師
浩歌藏戰甲雅拜習朝儀
天近雷風迅雲深雨露滋
告庭行有命祖載敢無詩
雪意留金勒歌聲寄玉卮
明年秋秣賤釀酒約歸期

黃公度

鳥影度寒塘

秋色滿瀟湘天寒元鳥翔數聲離疊嶂片影度橫塘風
翻搏寥廓煙蹤入渺茫乍隨萍苒沒還共水雲長冷浸
千尋碧斜侵兩岸霜凝眸西塞遠幾點帶殘陽

范浚

避盜泊舟武康遠光亭下與同行分和杜工部

詩傷秋及宿江邊閣

錄一首

帶郭人煙少通村徑路微水光浮棟宇野色動窗扉小
樹無重數前山不合圍艱危臨虎窟奔迫詭牛衣白舫

竟何適丹楓看即稀西園小茆屋知復幾時歸

周必大

明堂慶成二十韻

親饗嚴三歲邦彝重九筵祖宗垂統大天地著功全惟
睿崇昭振于時展吉蠲發揮皇祐日潤色紹興年稽古
千齡羿齋心十日專揭名新扁榜

御書明堂及
明堂之門

書冊屏

輦羶

祝冊御名以九
月之七日書

假廟陰雲剝升煙皓月圓無風搖

燭影有瑞燦星躔不值連宵雨那彰倏霽天二觴猶翼

翼百拜愈乾乾

三日程禮上拜百餘

歸次徒勞奏

酌獻畢有司依舊制請歸小次

上弗許立俟亞終獻行禮

回班特許

駑來百官例側班階止之

賀儀隨仗入霑

澤御樓宣

禮畢即時垂拱殿受賀黎明御樓聖躬益莊

獻胙金絲合簪花錦

繡鮮慈皇顏有喜聖孝古無前

肆赦方畢即時獻胙德壽宮禁衛皆賜花和

氣騰都邑歡聲遍海隅祺祥應曼羨壽祿自延綿臣也

芻蕘賤恩斯雨露偏執綏華蓋裏草赦玉堂邊

玉堂殿名第

頌甘居後逢辰幸獨先四方今日靖申誦我將篇

范成大

除夜書懷

運斗寅杓轉周天日御迴夜從冬後短春逐雨中來
綠看看雪心丹念念灰有懷憐斷雁無思惜疎梅絮厚
眼生纈蔬寒腸轉雷燭花紅瑣碎香霧碧徘徊昨夢書
三篋平生酒一杯牀頭新歷日衣上舊塵埃搖落何堪
柳紛紜各夢槐隙光能幾許世事劇悠哉岐路東西變
義娥日夜催頭顱元自覺懷抱故應開踴躍金何意青
黃木自災身謀同斥鷃政爾願蒿萊

次韻郊祀慶成

帝德重堯緒天心與舜禋慶期符後甲元日際初辛土
緯扶南極旄胡拱北辰律諧風自艮衡正斗垂寅桂燎
靈宮曉蕭脂太室晨百神森壁壘萬衛密鉤陳日月青
旂色雷霆玉輅塵洗兵銀漢水收雪紫壇春天步臨黃
道仙班像玉宸陶匏宗素樸琮璧慕精純祕祝哀時對
高旂歛下賓金鐘鳴傑簏朱火焚芳薪日麗雞竿矗天
旋鳳律新端門敷錫後六合共綢繆

上元紀吳中節物俳諧體三十二韻

斗野豐年屢吳臺樂事并酒壚先疊鼓歲後即旗亭先擊鼓不已以迎

節意燈市蚤投瓊臘月即有燈市珍奇者數人醵買之相與呼盧彩勝者得燈價喜膏

油賤祥占雨雪晴簞簞仙子洞坊巷燈以連枝竹縛成洞門多處數十重菡

苞化人城蓮花燈最多檣炬疑龍見舟人接竹桅檣之表置一燈望之如星橋

星訝鵲成橋燈小家厖獨踞犬燈高閑鹿雙撐鹿燈屏展輝雲

母琉璃屏風簾垂晃水精琉璃簾萬窗花眼密萬眼燈以碎羅紅白相間砌成

工夫妙天下千隙玉虹明琉璃球燈每一隙映成一花簷蔔丹房挂

燈梔子

葡萄綠蔓紫

葡萄燈

方縑繡史冊

生絹糊大方燈圖畫史冊故事

圓

魄綴門衡

月燈

擲燭騰空穩

小毬燈時擲空中

推球滾地輕

大滾球燈

映光魚隱見

琉璃壺餅貯水養魚以燈映之

轉影騎縱橫

馬騎燈

輕薄行

歌過顛狂社舞呈

民間鼓樂謂之社火大抵以滑稽取笑

村田蓑笠野

村田

樂街市管絃清

街市細樂

里巷分題句

每里門作長燈題好句其上

官曹

別扁名

官府名額多以綃或琉璃照映

旱船遙似泛

夾道陸行為競渡之樂謂之划旱船

水傀儡如生

水戲照以燈

鉗赭褰牢戶

獄燈

嘲嗤繪樂棚

山棚多畫

一時可朝誚之人

堵觀瑤席隘喝道綺叢爭禁鑰通三鼓歸鞭

任五更桑蠶春繭勸

春蠶自臘月即入食次所以為蠶事之兆

花蝶夜蛾迎

大白蛾花無貴賤悉戴之亦以迎春物也

鳧子描丹筆

紅畫鴨子相餽遺

鵞毛剪雪

英

剪鵞毛為雪花與夜蛾並戴

寶糖珍粬粒

餽指吳中謂之寶糖餽特為脆美

烏膩

美飴餉

烏膩糖即白餉俗言能去烏膩

撚粉團樂意

糰子

熬稗膈膊聲

炒糯

穀以卜俗名亭婁北人名糯米花

筵尊巫志怪香火婢輸誠

俗謂正月百草靈故

帚葦針箕之屬皆卜馬多婢子之輩為之

筭卜拖裙驗

敝帚繫裙以卜名婦帚姑

箕詩落

筆驚

即古紫姑今謂之大仙俗名筭箕姑

微如針屬尾

以針姑卜伺其尾相屬為兆名針姑

賤及葦分莖

葦莖分合為卜名葦姑

末俗難訶止佳辰且放行此

時紛僕馬有客靜柴荆幸甚歸長缺居然照短檠生涯
惟病骨節物尚鄉情倚撫成俳體咨詢逮里毗誰修吳
地志聊以助譏評

閭門初泛二十四韻

并序

淳熙丙午重九後十日家人輩以余久病適新修
小舫勸扶頭一出以襁褓屯滯遂至北城檢校桃
花塢出關傍漕河望楓橋橫塘中路而還故有即
事詠景唐律之作

好在馳煙路平生載酒行摧殘身久病
契闊歲頻更昨夜燈花曉今朝稻把晴
出門新夢境觸目舊詩情水遠推蓬眩
天寬倚柁驚轉灣添絳挽罨岸并篙撐
舫後袞兒女艫前酌弟兄醅香新麴嫩
茗味小春輕紅皺分霜果黃薦撚夕英
纈林疎露屋朱閣靜臨城桃塢論今昔
楓橋管送迎山腰樵擔動木末酒旗明
竟日窰煙直中流塔影橫數帆殘照滿
一笛暮江平照網楓邊桁牽罾柳際棚
岫雲縈石住田水穴堤鳴過渡牛歸宿
穿籬犬

吠獐魚寒猶作陣雁遠更聞聲急榜潮痕出疎鐘暝色
生鄰翁欣問訊逋客愧寒盟一昨成歸卧於今負耦耕
生涯多塌颯心曲漫崢嶸猿鶴休多怨菰蓴尚可羹藥
囊吾厭苦扶僊且班荆

丙午新年六十一歲俗謂之元命作詩自貺

歲復當生次星臨本命辰四人同丙午初度再庚寅長
狄名猶記沙隨會若新童心仍竹馬暮境忽蒲輪鏡裏
全成老尊前略似春三年歸汶上千日卧漳濱剛長交

新泰陰消脫舊屯。網蛛縈藥裏。竇犬吠醫人。窗下烏皮
几。田間紫領巾。鯢淵方止水。鯤海任揚塵。波匿觀河見
維摩示病身。顰端還一笑。默識幻中真。
文潞公詩云。四
人二百四十歲
況是同生丙午
年僕用此事也

陸游

壬辰十月十三日自閬中還興元游三泉龍門
十一月二日自興元適成都復攜兒曹往遊賦

詩

勝地惜輕別短筇成後遊門呀一徑異木落四山秋野
鵲翔深竇蟠蛟擅古湫棧危縈峭壁橋迴跨奔流白雨
穿林至腥風卷地浮真成起衰病不但洗孤愁登陟知
難再吟哦為小留回頭即萬里雪滿戴溪舟

平都山

忠州
都縣

名山近江步蠟屐得閒行奔鹿衝人過藏丹徹夜明唐
碑多斷蝕梁殿半欹傾洞口雲常湧簷牙柏再榮行逢
負籠客卧聽送船聲乞我誅茅地靈苗得共烹

秋雨排悶

今夏久無雨從秋却少晴空濛迷遠望蕭瑟送寒聲衣
潤香偏著書蒸蠹欲生壞簷聞瓦墮漲水見隄平溝溢
池魚出天低塞雁征螢飛明暗廡蛙鬧雜疎更藥醖時
須焙舟閒任自橫未憂荒楚菊直恐敗吳杭夜永燈相
守愁深酒細傾浮雲會消散鼓笛賽西城

憶昔

憶昔西征日飛騰尚少年軍書插鳥羽戍壘候狼煙渭

水秋風夜岐山曉雪天金鞚馳叱撥繡袂舞嬋娟但恨
功名晚寧知老病纏虎頭空有相麟閣竟無緣壯士埋
巴峽獨孤策孤身卧海壖安西九千里孫武十三篇裘歎
蘇秦敝鞭憂祖逖先何時聞詔下遣將入幽燕

初夏

已過浣花天行開解粽筵店沽浮蠟酒步艤載秧船古
俗交情久豐年樂事偏出波蓴菜滑上市鯊魚鮮僧閣
梅山麓漁扉禹廟壖丹青不可畫得句一欣然

出遊

八月石帆秋聊為汗漫遊
本因尋友去却為看山留
小草題僧壁長吟上驛樓
月能從劇飲天可寄閒愁
高下評泉品縱橫記酒籌
花開遇門入水長信船流
翫驂人雖棄脂韋我自羞
此心君不信試往問沙鷗

楊萬里

擬進士金波麗鳩鵲詩

曳練為銀漢鎔金作月波
桂花斜麗處鳩鵲得光多
雲

葉三秋淨菱花一鏡磨宮簷輝水竹觀影淡星河霧濕
殘宵柝霜明欲曉珂螭頭餘映在劒珮已相摩

淳熙甲辰十月一日擬省試萬民觀治象詩

魏闕春風裏豐城曉日端三朝垂治象萬姓得榮觀老
穉看如堵章程炳若丹九天新雨露一札妙龍鸞遠覽
周官舊重瞻漢詔寬歡聲將喜氣銷盡柳邊寒

擬歸院柳邊迷詩

玉殿朝初退金門馬不嘶院深歸有處柳暗迹都迷紫

陌春無際青絲舞正齊風煙忘近遠樓閣間高低殘雪
鶯聲外斜陽鳳掖西少陵花底路物物獻詩題

朱熹

春雪用韓昌黎韻同彭應之作

既有陽春曲那無白雪謠連天飛不斷著地暖還銷未
掩高人戶難齊衲子腰稍開銀世界漸長玉枝條興盡
愁煙艇行迷認野橋酒腸渾欲凍吟筆為誰搖殘臘成
三白餘寒又一朝香隨梅蕊落輕伴柳花飄神女羞捐

佩鮫人敢獻綃東皇應好事避舍亦相饒

寄雲谷瑞泉菴主

憶昔誅茆日山房我自名風埃猶俗累煙雨負巖耕多
謝空門侶能同物外情肯來分半壑聊爾度平生少待
清秋日閒尋遠嶽盟不知誰是客一笑絕塵纓

擬縣補以蟲鳴秋詩

天籟誰為主乘時各自鳴如分百蟲響來助九秋清未
歇吟風調先催泣露聲乾坤闢氛氣草木斂華英易斷

愁人夢難安，嬾婦驚惟應。廣成子萬感，不關情。

古語云
絡緯鳴

嬾婦驚

見詩疏

三月晦日與諸兄為率真之約徘徊石馬晚集

保福偶成短句奉呈聊發一笑

春服明朝換晴川，漲綠陰追隨皆勝侶。邂逅即初心，社
蹟莓苔古。禪扉竹樹深，移尊真惜日。畢景共披襟，儉德
遵賢範。哇詞愧雅音，清和應更好。逸想寄雲岑。

是日約
後會為

仙洲
之遊

王十朋

元鳥至

昆蟲方啟戶元鳥亦知辰去自盲風候來逢化日春深
條煙雨濕廣廈羽毛新故壘尋遺跡雕梁拂舊塵早鶯
宜結友秋雁不同賓嘉爾能知義無忘舊主人

遊開先寺觀香爐瀑布諸峰讀李蘇二仙詩知
廬阜之勝在是紀以十韻

廬山何處好勝地有開先瀑水漱寒玉香爐生紫煙丹

霄常近日黃石不知年雁蕩靈湫合豐城寶劍連龜行
似朝斗鶴唳欲冲天馬尾只自洗牛頭奚用穿雄辭惟
太白妙句更蘇仙寺占星流處橋飛月出邊碑方閱華
藏夢已到棲賢明日游三峽歸心定決然

知宗柑詩用韻頗險予既和之復取所未用之
韻續賦一首三十韻

書閱揚州貢功觀禹化覃香苞分橘柚秋色動江潭

李德

裕橘賦動江潭之秋色

破暑花凝雪凌寒葉染藍金衣晴日照

唐宰

相賀柑子表云綠
葉含煙金衣爛日

朱實碧波涵

柳子厚詩何人摘實見垂珠

未上諸

侯計曾聞四皓談顏歡陸績母業世李衡男送客愈吟

桂

韓退之送桂州嚴大夫詩云家自種黃柑

記時坡詠儋

東坡在儋耳詩一年好景君須記正

是橙黃橘綠時

洞庭夸浙右溫郡冠江南節物清霜重家山綠

蒂含青黃出離落朱綠耀林嵐

柳子厚詩密林耀朱綠坡詩竹籬茆舍出青黃

昔貢千金顆遙馳萬里函

宣政間溫州貢柑每顆值一二千

新宜薦寢

廟香可供瞿曇夢子那能比羅浮未許參

予往在夔府食黃柑味頗

佳然不及溫柑遠甚去冬至泉州始食羅浮柑又遠不及夔子

何人傳黃陸端類列非

聘在品寧為四

李直方第果實名柑子第四

蒙恩或賜三

李德裕賦序上賜宰

臣等朱橘各三枚

鄉情寄初熟旅況憶幽探嘉拜親開合珍藏

淨洗甌

甌瓦器也新柑貯以瓦器則久而不爛

行將解印綬歸種當田蠶

根向橫陽覓

溫柑以平陽縣泥山為最

泥尋斥鹵擔

種柑宜鹹地

荒蕪耘

徑草封植伴溪桺不用千頭富聊資一餉湛茅齋闢杜

甫仙井吸蘇耽

神仙蘇耽鑿井種橘

佳境妙餐蔗閒庭勝蒔甘

甘

草也醫家謂之國老柳子厚詩蒔藥閒庭延國老

雁行三峽荔奴視四明柑欲

繼花為譜

歐公作牡丹譜

應同柳駐驂

歐公柳詩攀條莫惜駐征驂

禦偷籬

著棘愁凍灌添泔

泔米汁也鄉人冬月用以灌柑

掩映青雲葉光華碧

玉簪釀成浮甕蟻蒸辟蠹書蟬

柑橘花蒸以為香可辟衣書之蠹

護蒂

期存乳

相欲致遠必以蠟塗其蒂

留皮欲去痰

皮能下氣醫家用以治痰

恨無親

可遺松慘白巖菴

擬賦江南寄梅花詩

蔚宗居隴首陸凱在江南手折梅花寄人逢驛使堪吳
都尋半吐楚岸摘新含雪裏開纔一樓頭弄未三情深
殊折柳意重勝題柑溪上千株玉歸與待自探

林光朝

癸巳東宮生日

昭代濬源遠高秋寶月前神光浮蜀道瑞氣貫秦川銀
榜應如舊金莖若箇邊龍樓清晝出鶴禁彩雲連妙選
衣冠數旁開道德淵重爰分九六曲禮盡三千歲閨緣
長歷霜清欲上弦每看襟燕日已入夢熊篇沆瀣通三
殿笙鸞共一天東明到西極作頌自年年

陳造

再遊殖軒小酌

生世岐喧靜平章有不如宦途吾畫虎濠上子知魚去
索長安米歸紬笠澤書茲軒住蒼莽勝日復躊躇酒殘
扶頭後鶯聲禁火餘蘭風度樽俎蝶翅略襟裾有底煙
霄意便為水竹居可須供麴蘖未後課耰鋤花蓓紅酣
日池光碧浸虛鶴頭依綠荇龍骨鬧清渠詩境因超忽
愁端得破除時從一吟醉小計百車礫

姜特立

湖光為劉慶遠作

湖水浸坤軸湖光混太清風來縠紋遠夜靜鏡奩平初
訝琉璃軟還疑組練橫微茫連澤國潏灩覺環瀛破碎
翻千月泓澄印萬甍雨來添點綴日射鬪晶明橋影虹
垂澗杉陰幕覆楹魚跳全薦玉山卧半沉瓊小汎依吳
榜長謠任楚萍屈原終獨醒李白漫消醒暇日宜呼客
平時好濯纓吟哦萬景集未足稱詩情

歌豐年

稔歲非常歲時時霧雨并陂塘留夜月澗谷瀉秋聲卧
袂驚宵冷披紗怯曉清水泉俱自足阡陌更無爭荷鋤
疏餘浸腰鎌候小晴秫材寒眼富酒興老誕生便覺糟
牀注還欣庾粟盈新君鍾瑞慶舊俗迓昇平賽社雞豚
具迎神笳鼓鳴支離徒受粟一飽愧斯氓

梅澗

勝事人間少芳堤盡種梅橫枝出疎影蠹枿長蒼苔瀟
灑依湍瀨飄零落酒杯戲魚時躍去凍蝶忽飛來宛似

孤山見還如庾嶺開只將松作友更與竹為媒迥出千
林表真成百卉魁羞爭桃李豔自是棟梁枚止渴將軍
智調羹上相材風光無著處吟思發春雷

陳藻

城山

雲霧成佳景天明又幾回忽攜詩句入別放畫圖開遠
樹沉如立行歌去似來小船衝雨過高柳接湖栽月傍
孤青樹名呼怪石臺故園無夢想近擬築巖隈

樓鑰

經筵講詩徹章進詩

聖主承丕祚於今歲幾遷昭回光飾物剛健位乘乾善
治新更化當陽獨攬權誅鉏及共鯨擢任列闕顛舊日
方謀始宸心最急先未遑親政理首務闢經筵恭儉甘
卑室尊嚴拱細旃晝居勤已甚坐侍禮無前講徹詩三
百時逢運半千諸儒深論說六義極摩研俯閱毛公傳
旁參鄭氏箋慨尋中古意重是素王編舊本三千首終

存十二篇雖遭煨燼厄所賴詠歌全開迹因農事安民
在井田成功時邁勺興業大明縣東國思平賦南山樂
得賢艱難由后稷勞來美周宣起自紹熙載迨茲嘉定
年關雎後肇彼殷武遂終焉寵數傳中旨恩光被邇聯
神文期繼踵元祐信齊肩內廐頒雲騎雕鞍絢錦韉茗
分龍焙品香拂御爐煙舞役咸宣力孤生亦備員少時
曾學製老去未忘筌納祿誠休矣歸畊久晏然鈴車俄
促召梓里謂登仙詞禁容揮翰天官命典銓豈知侵暮

境重得侍甘泉朽質何能報孱軀殆欲捐尚思求譎諫
海嶽效塵涓

杜旃

賦賢已錄

靜觀趙使君喜棋
有是錄約予賦詩

物理因人創神機自古傳揚雄嗟有法孔子歎猶賢勝
負存虛實初終謹後先按圖嚴畫井起數象周天百戰
期爭道三隅察守邊開基思漢祖復土想周宣審勢攻
無備沉幾救未然勝心遊碧落幽思及黃泉冒利魚貪

餌乘虛雁落弦紛爭忘父子迷感到神仙守必防重析
攻須出萬全妄興侵伐意私擅殺生權給弄心懷詐包
藏智益元甘辭韜甲冑險志匿山川諱忌真情露矜誇
小數專怯圍潛却步貪得暗垂涎見逼難思進相持莫
敢前蹈危鬚捋虎役志耳鳴蟬意滿渾忘食神馳更廢
眠弱形遭毒手短節不空拳悔誤徒批頰矜高欲比肩
禍胎還隱伏陣勢漫繚延詭道非存正羸師合忌堅設
心逾虺蜴攫子甚烏鳶造妙羣心妬趨亡衆目憐淺謀

徒躁進重地莫輕捐黑白因材見雌黃論豈偏高人真
託興遠見始忘筌鑒戒無忘此防虞蓋有焉請看奕碁
句何愧鬪雞篇

程秘

賦得紅藥當堦翻

禁近煙光潤堦平日影暄黃麻方草罷紅藥正花翻
舊色浮春動清陰匝午繁心傾青瑣客香滿紫薇垣漏永
文書靜天低雨露溫人言有仙骨早晚拜明恩

薛師石

橫參樓和老杜韻

僻懶便幽處江湖稱隱心地偏欣改觀樓豁喜初臨暖
日低輕帽良朋接短襟潮聲全有韻帆影半回陰翠麓
添重色鱸風出淺林嶼頭煙瘴遠沙觜浪痕深寂靜雲
歸壑闌珊月近參人家已鼾睡漁父尚謳吟造化由來
久周迴忽見今愛他斜日照顛倒數山沉

周文璞

過葛天民新居

為憶空山雨，因嗟短髻霜。
幅巾終日仄，侍女古時妝。
烏桕殘林外，丹砂舊井傍。
不留禪月畫，只踞淨明牀。
湖鏡秋容淡，雲妝曉露香。
汲泉須透脈，種果便成行。
使鶴過村店，攜奴上野航。
極知秦外叟，全似賀知章。
對佛稱居士，翻經悟法王。
自將詩檢校，尤與竹商量。
嗟我渾無賴，非公不作狂。
莫移松下石，老子要乘涼。

閒居日有幽事戲作

竹暗僧窺戶，莎寒鶴上廳。
壁懸陳處士，屏貼少微星。
疊甃為疏圃，埋盆學蓼汀。
自知癡得計，常用醉為醒。
野客兼稱僕，幽禽代作伶。
浴鳬翻碧澗，鬪雀墮空庭。
算數推三甲，防身名一丁。
案頭松葉響，牆角柚花馨。
梵皮堆書笈，醪罌隱粟瓶。
茅茨隱煙雨，雞犬也忘形。

李昂英

觀定堂

梵宮凭水建，蓬荻費芟除。
岸破羣魚出，枝危獨鶴居。
定

鐘僧睡早揮塵客談虛月滿龕燈小風停幡影疎供盤
多佛果僧飯飽園蔬惟有開山老清高閉草廬

林希逸

山邨暮歸

點點殘鴉過孤村帶落暉籬邊聞犬吠山下有人歸遠
岫連芳塢長林繞翠微雲深認茅屋風細颺征衣樵唱
同尋徑猿驚為叩扉夜深燈火下兒女共依依

俞桂

和樂天初夏韻

雨脚來山岫溪痕漲岸沙插旗多酒戶挂網盡漁家地
出綳兒筍園收菜子花春歸鶯轉嬾風急燕飛斜杯瀉
青荷葉甌煎白玉茶孤邨流水晚數點有歸鴉

陳允平

香奩體

小院薰風滿閒庭白晝長蜻蜓楊柳岸鷓鴣菱荷塘雲
合朱簷卸山高翠閣涼蔓滋青薜荔芽長紫良薑簾幙

深深地闌干曲曲廊淡煙瑤草細流水碧桃香幡影重
門靜苔痕小篆荒螭盤丹鼎雪龍吸露臺聚琴古翻新
調笙沉靜舊簧雨聲犀角枕月色象牙牀掌上雙鸚鵡
屏間兩鳳凰石函藏寶劍金鑰啓瑤箱扇雉團清影匿
鴛鴦試曉妝霞綃衣窄索雲錦佩玎璫髻攏金蟬矗釵橫
玉燕翔袂飄天水碧裙濺鬱金黃太液簫初遠蓬壺漏
未央流星飛碧落零雨下銀潢去去人千里迢迢天一
方斷腸春洛浦殘夢夜瀟湘

謝翱

中秋憶山中人

茲夕發清嘯為君楚舞終西風五陵夢涼露九霄中野
邏煙常起溪流榜不通天陰無乳兔林盡見飛鴻濕濕
雲垂髮丸丸樹偃弓劒歌元武暮塵語白鷗空祇有淮
南汨應沾青桂叢

雨宿太白

有阜陵書太白
名山賜僧了朴

城中家斧冰此地絕炎蒸天食青童捧龍居白氣升暗

燈猶宿火寢服尚裛繒客話從前事書傳入內僧風流
今獨盡雲物老相仍淨榻搜涼卧危闌入醉凭雨師行
下界鳥夢識中乘明發甬南去他山逢智宏

夜宿雪竇上方

雪竇師剡人住近
支道林買山隱處

眠山枕斧柯獨客愛盤阿畏日生塵夢尋仙到鳥窠下
方聞夕磬南斗挂秋河寢服侵雲卷潁泉通瀑和竇分
滄海月禪入沃洲歌此地精靈聚中宵弄薜蘿

黃希旦

桂華軒

初意抑何嘉軒開號桂華欲高諸子志先擬素娥家夜
影庭間竹秋香檻底花琴清彈淥水酒美酌流霞舊帙
惟黃卷新詩罩碧紗定知攀折處從此路非賒

葛長庚

贈鶴林

骨氣秋江月文章春苑花片心窮萬法半語辯千邪朝
罷雞司曉醉酣蜂報衙未為三島客笑指五雲家騎月

遊滄海鞭霆步太霞鬼神私側目袖裏一青蛇

惠洪

陳奉議生辰

華國生賢俊江山孕秀靈鴨頭淦水綠螺髻玉筍青
敏捷收科第竒豪見典刑笑談回暖律詩句挾風霆官偶
求彭澤才宜在漢庭麒麟橫逆氣鸞鷟斂修翎民訟多
閒日棠陰自滿亭浪傳書課奏須看鼎彝銘仲夏逢佳
節非煙聚杳冥數葉餘一葉推道間千齡阡陌登豐後

笙歌爛漫聽綺筵環妙麗壽竿捧娉婷歡洽連更燭情
高促畫屏九衢花照夜萬井月開局風颭銀河動天驚
玉露零三台深密處旁有老人星

御選宋詩卷五十九

欽定四庫全書薈要卷一萬八千三百六十七

集部

御選宋詩卷六十

七言長律一

楊億

郡齋西亭即事十韻招麗水殿丞武功從事

郡齋退食復何為縱目西亭景物奇
疊嶂雨餘泉眼出澄潭風靜釣絲垂
城臨古戍寒蕪闊路轉荒村野約危
幾處唱歌聞白紵誰家沽酒見青旗
蝶隨遊伎穿花徑

犬吠行人隔槿籬桃李成蹊春盡後魚鹽為市日中時
桑麻萬頃晴氛散絲竹千門夕照移吟際嶺雲飛冉冉
望中隴麥秀離離煙迷喬木鶯遷早水滿方塘鷺下遲
鶴蓋翩然肯相顧主人終宴豈知疲

次韻和席衢州憶洛陽春遊十四韻

周漢經營迹未遐山川形勝最堪嘉前瞻闕塞千尋出
旁逗伊流一派斜子晉鳳笙調夜月宓妃羅襪映朝霞
何人貰酒青樓曉幾處尋春紫陌賒駿馬每從金埒試

芳叢多展翠帷遮出逢勝境爭飛蓋歸逼殘陽競走車
庭竹惹煙披嫩籜皐蘭裛露長新芽嵩峰嶒嶒疑摩斗
洛水清泠欲見沙萬井間閭真陸海九重宮闕是天家
禁林日暖空啼鳥御苑風微自落花關路行人偏絡繹
津橋賈客苦諠譁何當獻賦論遷邑便欲拋官學種瓜
江海三年勞夢想田園二頃有生涯應知父老沾堯化
長挈壺漿望翠華

集賢宿直寄中書李梁二舍人

耿耿銀釭照直廬西風黃葉滿庭除愁心不忍聞寒雁
病眼猶能拾蠹魚敲枕微吟空展轉遶廊閒步自躊躇
銅龍漏滴傳鈎盾玉兔光芒射綺疏薄宦久淹滄海郡
故交多入紫垣居洛陽已在拜塵後宣室那逢膝席初
投閣寂寥深自愧抱關憔悴擬何如寧思西掖五花判
且補河東三篋書桑梓狂拋萬里外蓬萊試住十年餘
釋之不調嵇康懶終待休官學灌蔬

次韻和十六兄先輩見寄

秋風苦憶鱸霜鱗暫剖銅符出紫宸一路雪寒多挾纈
幾程山險欲摧輪清香撲鼻梅林近秀色凝眸麥壠新
閉閣草玄終寂寞下車為政尚因循尋僧不厭攜筇遠
愛客寧辭舉白頻簿領孜孜防黠吏丘園矻矻訪遺民
魚鹽自與滄溟接雞犬仍將白社鄰官滿會須拋印綬
武夷歸去作閒人

寄章徵君

水陸都無數舍程魚符龜印苦相縈夢魂長繞龍門坂

姓字終懸月旦評
鮑室清琴應獨撫
融樽淶醕共誰傾
春深詩石苔衣駁
雨過書齋草帶生
鴻寶枕中初得術
丹臺籍上已題名
清談宛有南朝體
嘉遯全忘北闕情
金馬深嚴堪避世
滄浪清淺未沾纓
諸儒正議明堂事
軋軋蒲輪即奉迎

章徵君見和所寄詩再次本韻酬贈

武夷山秀建溪清
身隱心閒事不縈
前古是非為已任
故鄉人物與誰評
勸農春壟巾頻折
逢客秋郊蓋暫傾

綵服趨翔娛壽母絳帷談論誘諸生
潁流洗耳殊非達谷口躬耕亦近名
博奕自堪銷永日絲桐兼得助高情
莫嫌霜雪將侵鬢須歎塵埃漸滿纓
早晚鳴騶催上道聖君虛左欲相迎

次韻奉和知府溫尚書送致政朱侍郎十六韻
拜章納祿便歸休祕殿親辭十二旒
閣筆罷批丹鳳尾拂衣初下六鰲頭
非緣荆渚依劉表定欲箕山訪許由
北闕子牟終眷戀南朝安石本風流
明庭顧遇違三接

別墅生涯治一丘身健寧煩策鳩杖心閒無復夢刀州
素風有子堪傳遺禪論將誰共對酬白壁賜多應尚在
黃金散盡不須留人欽雅譽芝蘭馥帝憶嘉言水石投
祖帳特令開上苑歸帆那肯待高秋

侍郎辭日上令待
秋涼即程堅請便

行
幾程郵驛經濃暑千里山川見舊遊已是拋官玉堂
署尚思陪宴井幹樓時裁奏牘猶規諫旋寫丹經自校
讐鄉里高門表陰德國朝惇史紀嘉猷粉榆舊業須重
葺香火前緣莫廢修歲計將何資伏膺龍陽千樹木奴

洲

路學士知河中府

一麾新自海濱還又佩魚符入故關
千里山河臨劇郡九天鴛鴦別通班
樓經往聖迴清蹕路接邊陲獻白環
版籍素多田賦錯干戈初息羽書閒
從軍上客雕龍藻佐酒妖姬墮馬鬟
更遣府公吟思發中條新霽碧孱顏

鄭工部陝西隨軍轉運

西鄙攬搶未埽除營平慷慨請行初
三軍粒食資心計

一月星郵待捷書宣室喜聞延賈誼茂林久歎滯相如
謗言盈篋親曾見反間千金計豈疎遺愛道旁喧竹馬
先聲塞外懾穹廬馮唐莫歎淹郎署博望還忻擁使車
隴右行收萬里地關中坐致九年儲牙籌羽檄皆吾事
才思飄飄兩有餘

梅詢

送黃覺出鎮太原

五馬雍容出鎮時都人爭看好風儀文章一代喧高價

忠直三朝受聖知
帳下軍容森劒戟
門前行色擁旌旗
雲籠古戍黃榆暗
雪滿長郊白草衰
出去暫開貔虎幕
歸來須占鳳皇池
髻間未有一莖白
陶鑄蒼生固不遲

宋祁

送趙御史仲禮之任南臺

天子龍沙拜法官
議郎親戴辟邪冠
曉辭漠北冰霜重
秋到江南草樹寒
諫疏頻煩明主聽
題詩常共故人看
應憐閭里誅求急
尚布朝廷禮意寬
幕下風清鳴一鶚

臺端雪霽見雙鸞
寥寥渡海三冬翮
翮凌空五色翰
晉代新亭蒼蘚合
梁朝舊寺土花殘
石城慷慨悲袁粲
別墅風流憶謝安
千里憑高麾繡斧
幾回攬轡並銀鞍
諍臣事業須公等
努力明時匪素餐

范仲淹

紀送太傅相公歸闕

縉紳誰敢望差肩
獨向昌期協半千
首會雲龍游少海
親扶日月上中天
碧油兩就元戎鎮
黃閣三提宰相權

坐致唐虞成大化退居師傳養高年閒披丹訣開爐竈
醉度清歌被管絃同榜幾人登將相滿朝今日羨神仙
松楸薙草思純孝里巷揮金過昔賢歸赴誕辰如允說
輕安拜舞壽觴前

文彥博

次韻留守相公同遊龍門

鑿開青嶂啓天門直瀉伊流濺汝濱八節驚濤鼉振鼓
千花寶塔雁翔雲巖隈雨過飛泉漲谷口風回墮葉紛

龕穴隆穹三像列樓臺奕煥兩崖分方陪茜旆來尋勝
不就蒲餐趣茹葷北里笙竽皆擁從東方羅綺半酣醺
升堂共覩瞻仙貌策杖同尋古士墳喜脫貂冠親野老
幸隨熊軾附邦君林巒岑寂真堪賞市井喧譁漸厭聞
人度長川猶隱映香銷古殿尚氤氲周生歸後蘭重佩
荀令行時蕙更熏曉露未晞珠滴淚秋花爭發錦挑紋
羣娃散步塵生襪小艇爭登水濺裙釣叟旁觀皆歎羨
禪師迎謁盡歡欣既無冗局羈閒迹忍促回軒背夕曛

得向石頭溪上飲從今遂不畏移文

耆老會詩

九老唐賢形繪事元豐今勝會昌春垂肩素髮皆詩彥
揮麈清談盡席珍染翰不停詩思健飛觴無算酒行頻
蘭亭雅集誇修禊洛社英遊忝序賓自愧空疎陪几杖
更容款密奉簪紳當年尚齒尤多幸十二人中第二人

余靖

和伯恭自造新茶

郡庭無事即仙家野圃栽成紫筍茶疎雨半晴回暖氣
輕雷初過得新芽烘褫精謹松齋靜採擷紫迂澗路斜
江水對煎萍髮髯越甌新試雪交加一槍試焙春尤早
三盞搜腸句更嘉多謝彩牋貽雅貺想資詩筆思無涯

石介

燕枝板浣花箋寄合州徐職方

合州太守髯將絲聞說歡情尚未衰板與歌娘拍新調
箋供狎客寫芳辭木成文理差差動花映溪光瑟瑟奇

名得只從嘉郡樹樣傳仍自薛濤時奇章磊磊馳聲價
江令翩翩落酒卮幾首詩成卷魚子誰人唱罷泣燕枝
紅牙管好同牀置紫竹笙宜一處施願助風流向樽席
杏花況是未離披

張問

題睢陽五老會圖

槐庭二老樂堯仁盛集高年洛水濱華袞具瞻雖禮絕
白頭序齒却情親清閒几席同禪院山墅巾裘似隱淪

樽酒椒香纔過節池塘草色已催春白公酣暢吟哦內
衛武康強笑語頻豈獨丹青傳不朽潛欣風俗欲還淳
芝田鶴戲調形健蓮葉龜游納息勻商皓寂寥拘小隱
漢疎局蹙止家人莫因氣貌疑丹竈自有光陰寄大椿
復得兼暮為重客司馬君實
未七十恐遺元爽在編民神仙可
學今方信道術相忘久益真滿座交歡祝眉壽羣生五
福托鴻鈞

歐陽脩

夷陵書事寄謝三舍人

春秋楚國西偏境陸羽茶經第一州紫籜青林長蔽日
綠叢紅橘最宜秋道塗處險人多負邑屋臨江俗善洄
臘市魚鹽朝暫合淫祠簫鼓歲無休風鳴燒入空城響
雨惡江崩斷岸流月出行歌聞調笑花開啼鳥亂鉤輦
訟庭畫地通人語邑政觀風問里謳土俗雖輕人自樂
山川信美客偏愁黃牛峽口經新歲白玉京中夢舊遊
曾是洛陽花下客欲誇風物向君羞

寄梅聖俞

青山四顧亂無涯，雞犬蕭條數百家。
楚俗歲時多雜鬼，蠻鄉言語不通華。
繞城江急舟難泊，當縣山高日易斜。
擊鼓踏歌成夜市，邀龜卜雨趁燒畬。
叢林白晝飛妖鳥，庭砌非時見異花。
惟有山川為勝絕，寄人堪作畫圖誇。

蘇舜欽

依韻和王景章見寄

歲律崢嶸臘候深，一天風雪卷愁陰。
故人默默懷交意，

逐客棲棲去國心
千里相望空眇盼
當年下吏阻追尋
咄嗟謗口聞高誼
披豁羈懷見雅吟
學道元將禦窮困
浮生何必計升沉
世間機穽知難避
往者圖書可自任
猶得雲山開醉眼
可無俗物撓沖襟
鵬來閒暇何須怪
鬼見揶揄豈易禁
楚客留情著香草
啓期傳意入鳴琴
夫君自上丹霄去
莫忘雲泉寄好音

梅堯臣

次韻和春日偶書

甕面春醅壓嫩藍盤中鵝炙亦肥甘正宜醉夢輕為蝶
苦怕酬詩密似蠶病起羊公方隱几歸來陶令只乘籃
河堤古木欣欣暗野水新秧拍拍渰已向官資隨分足
莫將忠憤等閒談況於世上諸般厭不作人間一例貪
陋巷自知當退縮擁門誰解更趨參高低趣舍難為合
冷暖情懷固飽諳勉意妻兒猶苟祿強顏冠冕未抽簪
唯公恩遇流連久頻對樽壘也負慙

蔡襄

城南春會

陰雲薄薄地無塵清曉城南集畫輪
睢苑即時裁雪霰潁川連夜聚星辰
山眉帖漢晴光擬鶯舌尋風碎語眞
芳草有情迷謝客落花無地問秦人
尊前莫厭歌醒耳世上偏饒淚滿巾
嘉意未闌繁盛減東皇底事惜殘春

劉敞

劉永年部署清燕堂

文丞相
為作之

漢廷謀帥用詩書丞相今來握虎符
帳下偏裨皆緩帶

軍中談笑亦投壺故開廣榭宜高會自有清泉入座隅
三輔衣冠獻謠俗五陵豪傑壯規模椎牛醴酒捐長日
急管哀絃舞豔姝射取天狼作乾豆莫推衛霍擅西都
謝伯初

走筆寄夷陵歐陽永叔

舟行作險似瞿塘蒲峽猿聲斷旅腸萬里更堪人謫宦
經年應合鬢成霜長官衫色紅波綠學士文華蜀錦張
去似長沙非黜辱比於連郡亦遐荒

韓退之以言事
初貶連州令可

能作賦嘲平渚好為投文弔耒陽下國難留金馬客新
詩傳與竹枝娘才如夢得多為累情甚安仁久悼亡絕
境化成儒雅俗遠民爭識校讐郎典詞縣待修青史諫
草當來露阜囊不用臨流羨漁者便將纓足濯滄浪

徐積

雪

君看飛雪競翩翩雲將爭驅正著鞭人望已酬殘臘後
物華兼值早梅天招沽北掾輸平日走馬西州憶少年

漏屋旋消濡弊褐
破窗穿過濕餘箋
蹄涔易見真窪滿
糞土難辭偽色鮮
席戶冷灰人削迹
朱門熱炙客摩肩
紛紛萬事還如此
寂寂幽懷盡舍旃
流水明中爭趁月
斷鴻深處獨藏仙
誰家漁棹空聞笛
何處樵邨只見煙
最好耕農相賀了
牛衣醉卧夕陽田

王安石

送江寧彭給事赴闕

西江望士衆長兼
卓犖傳家在一男
壯志異時開史牒

妙齡終日對書龕桂堂發策收科選櫻苑頒詩豫宴酣
大邑援琴聊試可小州懷紱果才堪分臺拜職榮先入
抗疏辭恩恥橫覃勁操比松寒不撓忠言如藥苦非甘
龍鱗直為當官觸虎穴寧關射利探朱轂獸頭終協夢
粉闌雞舌更須含均輸北轉荆門鷁勸課西臨蜀市蠶
期信有兒迎郭伋食貧無地乞羊曇橐垂鈴棧駝鳴圖
節擁棠郊虎視眈歸見廣墀瞻斧藻對揚初服改朱藍
進班華省財方阜出按窮邊虜稍戡帝命賈琮當冀北

民歌姬奭次周南投壺饗客魚無乙伐鼓蒐兵馬有驪
鯨鬣掀紅旗沓沓虬髯吒黑纛髣髴威加諸部風霜肅
惠浸連營雨露涵大斗時時能劇飲輕裘往往祇清談
乾龍已應天飛五晉馬徐觀晝接三道在君臣方自合
德侔卿長亦誰慙便蕃育校平生寵放曠皆知雅性耽
委佩去辭廷殖殖揚舲來得府潭潭一尊客語從容盡
千里人情委曲諳豈但搢紳稱名杜故多扶杖祝彭聃
幕中俊乂間刀筆帳下驍雄冷劒鐔楚地怪須留汲黯

蕭規疑欲付曹參從來貴勢公何慕自是賢名上所貪
未信逸身今已老且當憂國每如惓論心邂逅膠投漆
搔首低徊雪滿鬢鎮撫未驚移歲月追攀曾許賞煙嵐
餘歡遽隔新亭餞宿惠難忘舊館驂卷曲尚誰知散櫟
崢嶸空此詠枯楠

鄭俠

謝工部徘徊堂

高堂增構廣幽齋鑿破青青遍地苔雲入洞房疑有氣

月當疎牖若為開路無荆棘皆新闢砌得芝蘭是舊栽
流水聲中迎送屐綠筠叢下獻酬杯達生不為休塵慮
齊物元由悟本來終見東山報重起未登蒲乘且徘徊

馮山

送徐之才赴洋州

三河使指皆精選八座郎官最上遊袖手看人趨要職
息肩隨分領偏州遐方暫屈嚴明府舊部爭迎郭細侯
常愛昔人為郡樂不妨循吏與民休粉榆指顧秦川近

臺榭周環瀟水流
闕下子牟心感慨
天涯賓客老淹留
方將振羽趨庭鷺
豈便忘機狎海鷗
青漢繞山迎隼旆
北風吹雪犯貂裘
從來恩館深仁遇
依舊鄰封竊庇庥
遠別不唯思酒盞
相忘何事更書郵
郢中無和陽春曲
時寄新聲欲強酬

春遊

依約東風共出城
雲容羞日弄陰晴
看人牆外衝花氣
下馬石間聞水聲
林葉半從樵刃起
草芽還傍燒痕生

趁時桃李參差發得意禽蟲各自鳴開謝眼前窮物態
豐登時下見民情悔將詩筆隨春酒萬景投懷醉不成

蘇軾

次韻周開祖長官見寄

俯仰東西閱數州老於岐路豈伶優初聞父老推謝令
旋見兒童迎細侯政拙年年祈水旱民勞處處避嘲謳
河吞巨野那容塞盜入蒙山不易搜仕道固應慚孔孟
扶顛未可責由求漸謀田舍猶懷祿未脫風濤且傍洲

惘惘可憐真喪狗時時相觸是虛舟
竭來震澤都如夢
只有茗溪可倚樓
野釀酸甜如蜜水
樂工零落似風鷗
遠思顏柳并諸謝
近憶張陳與老劉
風定軒窗飛豹脚
雨餘闌檻上蝸牛
舊遊到處皆蒼蘚
同甲惟君尚黑頭
憶昔湖山共尋勝
相逢杯酒兩忘憂
醉看梅雪清香過
夜權風船駭汗流
百首共成山上集
三人俱作月中遊
海南未起垂天翼
澗底仍依徑寸床
已許秋風歸使得
豫憂詩筆老難酬
此生歲月行飄忽
晚節功名亦謬悠

犀首正緣無事飲馮驩應為有魚留從今便蹋青州麴
薄酒知君笑督郵

次韻樂著作野步

老來幾不辨西東秋後霜林且強紅眼暈見花真是病
耳虛聞蟻定非聰酒醒不覺春強半睡起常驚日過中
植杖偶逢為黍客披衣閒詠舞雩風仰看落蕊收松粉
俯見新芽摘杞叢楚雨還昏雲夢澤吳潮不到武昌宮
廢興古郡詩無數寂寞閒窗易粗通解組歸來成二老

風流他日與君同

次韻楊褒早春

窮巷淒涼苦未和，君家庭院得春多。
不辭瘦馬騎衝雪，來聽佳人唱踏莎。
破恨徑須煩麴蘖，增年誰復怨羲娥。
良辰樂事古難並，白髮青衫我亦歌。
細雨郊原聊種菜，冷官門戶可張羅。
放朝三日君恩重，睡美不知身在何。

和致仕張郎中春晝

投綬歸來萬事輕，消磨未盡祇風情。
舊因尊菜求長假，

新為楊枝作短行不禱自安緣壽骨深藏難沒是詩名
淺斟杯酒紅生頰細琢歌詞穩稱聲蝸殼卜居心自放
蠅頭寫字眼能明盛衰閱過君應笑寵辱年來我亦平
跪履數從圯上老逸書閒問濟南生東風屈指無多日
只恐先春鷓鴣鳴

生日王郎以詩見慶次其韻并寄茶二十一片
折楊新曲高人趨獨和先生于為于但信櫝藏終自售
豈知盃脫本無櫬竭從冰叟來游宦肯伴驪仙亦號儒

棠棣並為天下士芙蓉曾到水邊郭不嫌霧谷埋松柏
終恐虹梁荷棟桴高論無窮如鋸屑小詩有味似連珠
感君生日遙稱壽祝我餘年老不枯未辦報君青玉案
建溪新餅截雲腴

蘇轍

記歲首鄉俗寄子瞻二首

錄一首

踏青

江上冰消岸草青三三五五踏青行浮橋沒水不勝重

野店壓糟無復清松下寒花初破萼谷中幽鳥漸嚶鳴
洞門泉脈龍睛動觀裏丹池鴨舌生山下鉞罌霑稚孺
峰頭鼓樂聚簪纓縞裙紅袂臨江影青蓋驂騑踏石聲
曉去爭先心蕩漾暮歸誇後醉縱橫最憐人散西軒靜
曖曖斜陽著樹明

送王恪郎中知襄州

魏公德業冠當年汝守威名竦漢邊將相傳家俱未遠
子孫到處各推賢風流最喜君真似符竹連分政得專

峴首重尋碑墮淚習池還指客橫鞭逃亡已覺依劉表
寒俊應須禮浩然當有郡人知古意攔街齊唱接羅篇
和毛君新葺困菴船齋

厭居華屋住東菴真味全勝食齋甘多病維摩長隱几
無心彌勒便同龕誤遊田舍空成笑謬入僧房即欲參
風霽不知吹有萬月明聊共影成三齋如小舫才容住
室類空困定不貪擁褐放衙人寂寂脫巾漉酒髮鬢鬢
畫囊書帙堆窗案藥裹瓢樽挂壁籃簷竹風霜曾不到

盆花蜂蝶未全諳
公餘野鵲驚初睡
賓醉佳人笑劇談
勸客巨觥那得避
和詩難韻不容探
曉來霏霧連江氣
冬後溫風帶嶺嵐
去國屢成還蜀夢
忘憂惟有對公酣
終身狗祿知何益
投檄歸耕貧未堪
借我此菴泥樂竈
古書鴻寶試淮南

蘇頌

同賦山寺郁李花

小樹扶疎若剪裁
新英濃淡對山齋
青紅相間垂羅帶

華葉同開綴寶釵未必無言芳徑列須看成實翠珠排
禪局掩映情多感藥譜標題品最佳衆卉紛敷爭欲並
三春顏色此難偕誰憐寂寞游觀少便與移根向玉階
彭汝礪

寄伯兄兼問子文二首

富貴浪圖雖汨汨詩書餘力尚桓桓聖門一室相從易
世路多岐欲合難儀鳳穩移深閣宿老蛟寒即碧溪蟠
青雲有侶歌魚藻空谷無朋唱考槃緣木退藏冲漢翼

扁舟歸整釣鼇竿
臨風願聽王陽仕
洗手思彈貢禹冠
壯志當年欲請纓
孤宗今日尚飄萍
塵埃易染羈容黑
氣義難邀俗眼青
馮客劒寒長自擊
伯牙絃古欲誰聽
風雲勇膽馳燕塞
社稷丹心望漢庭
思入鵲原愁四散
夢馳鶯谷涕雙零
客悰願託詩情見
吟盡清宵卒未醒

張耒

清明卧病有感二首

支離病卧逢佳節
漂泊西遊寄洛城
重帽避風惟益睡

青筇扶步不禁行紅飄淺萼知風急綠滿新林寄鳥聲
不見賈生遺宅處空傳金谷舊園名悲歌身世驚將老
悵望古今空復情笑看家人競時節爭持新火照清明
飄萍著處卽為家伏枕悠悠對物華處處鞦韆競男女
年年寒食亂風花藥囊親坐勞頻檢酒甕生塵亦可嗟
未老會尋吳市卒苦貧須種邵平瓜雲煙南望羣山會
水樹東浮去路斜行止此生應有命不須辛苦問生涯

朱長文

送知府滕光祿

榜登龍虎亞倫魁一紀橫飛長憲臺謨議軒昂開日月
辭章雄偉鼓風雷朝端已慶明良會廟論咸推將相才
一跌雲衢成老大幾遷方面歎遭迴致君事業看雙鬢
經國風猷付玉杯驅弩屢驚園令出引車還喜買臣來
展墳乍覺青松長視學追懷絳帳開榮滿江山增氣象
仁需里巷舞兒鮐齊雲晚詠難留白

白傳將去蘇有齊雲樓晚望之作

綠野新居欲繼裴淮海巨藩雖重寄傳巖須起作鹽梅

喜雪上太守

築壇精禱意通神
零雨先期澤此民
驟作六花猶及臘
更遲一日即回春
斜飄燕寢初驚密
平壓高樓漸喜勻
千里山河忘險隘
十門坊市絕埃塵
謝庭賀燕凌晨集
郢曲歌聲遇景新
細入吟窗粘凍壁
輕隨舞袖落華茵
膠舟漸進危檣遠
汲井彌甘短綆伸
遍壅枯根蘇杞柳
巧裝寒葉活松筠
終朝訟息延嘉客
幾度年豐達紫宸
力可回天消旱暵
為霖宜待傅巖人

劉弇

贈致政曾宣德十二韻

自得逍遙物外情，肯將冠冕謾勞形。
門前始種先生柳，斗下重添處士星。
文豹霧中誰逐逐，飛鴻天外自冥冥。
最憐孤竹人高卧，却訝三閭客獨醒。
放曠七賢林下洞，棲遲六逸水邊亭。
和煙買得花栽潤，帶雨移來藥顆馨。
鳬舄印殘蒼蘚綠，蝸廬築破遠山青。
消磨日月棋千局，笑傲雲霞酒一罍。
隱几旋成招隱句，披衣新看養生經。

小軒靜把琴開匣幽苑深將鶴剪翎明月有時來竹塢
紅塵無路到松局幾多九老圖中景都為丹青入障屏

傅察

晚登清微亭次祝教授韻

雉堞亭亭倚翠微高樓裊裊弄清暉共邀佳客扶筇杖
驟喜涼風振羽衣過眼山川顏色好投林鳥雀噪聲稀
月搖翠浪明珠碎雲滿金波破鏡飛雄辯琅琅如落屑
新詩句句似連璣自憐性癖耽幽寂却恨息息便賦歸

王庭珪

和歐陽廣明竹間桃花

雨罷新花明曉日竹陰瑣碎錯黃金牆頭過盡雙飛蝶
葉底巧啼何處禽玉女洗妝勻淺淡老龍脫籜著青深
柔姿敢並高標立直節時容粉面侵愛客分明莫來折
坐輿徑造不須尋桃花落後春事已惟有清風滿竹林

張綱

次韻蘇晉翁見寄

不見梁王舊吹臺年來愁眼向誰開
求賢廊廟無虛日報國涓塵自乏才
直指謾能迎櫺具永懷寧敢詠金罍
相看鬢髮霜千丈自視文章水一杯
晚歲可憐神氣索故人猶寄好詩來
追還正始真堪喜突過黃初豈易陪
婉孌也知能度曲葡萄應已釀新醅
何時東閣容驚坐一日那辭一百迴

蘇籀

仲秋苦熱半格一首

老火薪蒸鼎竈然柔金低伏墮燔煎虛窗疊巘攢三峯
冷枕清飈直萬錢俛仰生涯恃林井包纏冠紱晒飀飀
朝蠅夕蚋嗟何集山雪河水渴沃漙子夜涼生秋思肇
午時炎熾赫曦鮮蔭饒華桷單絺叟嬉愛清川泳月船
巾幘垢氛勤醜濯果看剝剝萃新妍芸夫望望瞻雲漢
鉦鶴聲聲喚碧天瀑水何山千尺瀉洗心安得賞懸泉
崔與之

送袁校書赴湖州別駕

秘書監

奎壁光芒久聚東
奏篇入獻大明宮
胸中抱負經綸業
筆下鋪張造化功
四海高名如日揭
一襟和氣與春融
誰知正大傳家學
惟有擎拳體國忠
華踐峻登羣玉表
清修屹立急流中
校讐正對青藜月
闕決俄分畫戟風
自喜合簪方袞袞
不堪分袂太怱怱
送君悵望雲帆別
顧我凋殘雪鬢蓬
戰羽孤棲憐病鶴
脫身高舉羨冥鴻
星躔已應魁三象
天路須知尺五通
若水臘前新蟻綠
橘洲霜後巨螯紅
清談岸幘聊遊戲
獻納歸班萬口同

汪莘

贈祁門不老山高法師

鰲山萬仞峙璇霄上有高真道寂寥
趺足壯能軒物表洗心清不浣塵囂
洞天別有風光異人世那知宇宙遙
雲覆醮壇閒悄悄煙凝仙室靜蕭蕭
步虛韻穩聽晨禮環珮聲遲識晚朝
飯啗青精顏色好詞歌白鶴利名消
囊空阿堵緣辭寵匣蓄干將為斬妖
折角巾多裁氎布隱居衣盡屏鮫綃
神遊汗漫趨蓬島禹步迴旋指斗杓

九轉丹砂盈日月三千功行繼松喬密渠細石通泉竇
斜插疎籬護藥苗甕裏春醪斟琥珀壁間修扇閣芭蕉
蟠桃欲熟人爭竊野菜初生手自挑花卉得時舒錦繡
餅湯娛客奏笙簫長松夭矯龍千尺嫩竹琳瑯玉萬條
鳳翅亂峰森洞口羊腸微徑繞山腰牀眠癭木肱常曲
兀坐文藤足屢翹衮衮騫河傾俊辯溫溫和璞琢孤標
我慙未躍三春浪君去行看八月潮好把陰功拯存沒
西歸宜早買吳舫

周弼

仲宣樓

仲宣徙倚思歸後又復誰傳獨步名自昔城闕雖尚在
至今波浪未嘗平半規赤日沉荒渚一縷黃煙起廢城
梅落碎花催塞色葭橫響葉弄邊聲驚寒牧馬頻回顧
趁暖賓鴻漸北征況乃有懷傷歲暮登樓那不動鄉情

汪元量

鳳州

鳳州山館有清輝古木扶疎散陸離紅尾錦雞鳴古埭
綠頭花鴨蕩幽池荷聲策策秋來後桂樹團團月上時
病馬啗菱思故櫪驚鳥繞樹宿何枝三分割據人如夢
滿目興亡客似癡走筆成詩聊紀實岷峩風土出蹲鴟
葛長庚


捲雪樓

煙水蒼蒼古渡頭神鴉噪罷纜方收泊舟鳧渚鷗汀晚
夜入蘭宮桂殿秋綠葦黃蘆悲落日白蘋紅蓼鬧滄洲

冥冥千古今如夢浩浩長江不管愁雁陣歸時雲似幕
風檣高處月如鉤驚濤飛起銀花舞萬頃寒光十二樓

謹案卷六十第二十四頁前五行高樓裊裊弄清

暉刊本暉訛晴今改



總校官庶吉士臣侍朝

校對官檢討臣蕭九成

謄錄舉人臣李駟